

आकाशवाणी

- प्रधानमंत्री नरेन्द्र मोदी होरें गैर-कानूनी विदेशी नागरिकें दे दाखिल होने थमां खबरदार करदे होई आक्खेया ऐ जे एदे करी देश दी आबादी दे संतुलन गी खतरा ऐ।
- राष्ट्रीय राजमार्ग प्राधिकरण आसेया Fast Tag Annual Pass देशभरै दे इक हजार 150 टोल प्लाजाएं लेई लागू करी दिता गया ऐ।
- श्री कृष्ण जन्माष्टमी दा त्योहार देशभरै च धार्मिक श्रद्धा ते उत्साह कन्नै मनाया जा रदा ऐ।
- भारतीय मौसम विभाग नै अज्ज कोकन ते गोआ च बड़ी भारी बरखा दा अनुमान जताया ऐ।
- भारत थमां चीजें-बस्तें दे निर्यात च जुलाई महीने च बड़ा मता बाददा दर्ज होआ ऐ। पिच्छले इक बरे च देश थमां होने आले निर्यात च 7 इशारिया 3 प्रतिशत दी बढ़ौतरी दर्ज कीती गई ऐ जेड़ी 37 इशारिया 2-4 बिलियन डालर बनदी ऐ।
- रूस दे राष्ट्रपति व्लादीमिर पुतिन ते अमरीका दे राष्ट्रपति डोनाल्ड ट्रम्प हुंदे बश्कार अलास्का च होई दी गल्लबात यूक्रेन-रूस संघर्ष गी रोकने लेई सैहमती बनाने च नाकाम रेई ऐ।

PM- Demography

प्रधानमंत्री नरेन्द्र मोदी होरें विदेशी नागरिकें दे गैर-कनूनी तौर पर भारत च बसी जाने थमां खबरदार करदे होई आक्खेया ऐ जे देश दी आबादी दा संतुलन बिगड़ने दा खतरा ऐ। स्वतंत्रता दिवस पर अपने भाषण च उनें गैर-कानूनी अपरवासन थमां देश गी बचाने लेई इक उच्चे स्तर दा डेमोग्राफी मिशन खडेरने दी घोषणा कीती। प्रधानमंत्री होरें आक्खेया जे ओ राष्ट्र गी इस खतरे थमां सतर्क करना चाहंदे न। उनें आक्खेया जे इक समझी-सोची साजिश दे तैहत भारत दी आबादी दे संतुलन गी बदलेया जा रदा ऐ ते इक नमें संकट गी पैदा करने दी कोशिश कीती जा रदी ऐ। प्रधानमंत्री होरें आक्खेया जे विदेशी नागरिकें आसेया देश दे नौजवानें दा रोजगार खुसेया जा रदा ऐ ते ओ साढ़ियें माए-भैहने गी निशाना बना रदे न। विदेशी नागरिकें आसेया आदिवासियें गी गुमराह कीता जा रदा ऐ ते उन्दी जमीनें उप्पर कब्जा कीता जा रदा ऐ। प्रधानमंत्री होरें आक्खेया जे इस साजिश गी बर्दाश्त नैई कीता जाग। उनें आक्खेया जे देश दी सीमाएं कन्नै लग्गदे इलाकें च आबादी दे संतुलन च बदलाव राष्ट्र दी सुरक्षा लेई चुनौती ऐ।

<><><><><><>

PM -GST

प्रधानमंत्री नरेन्द्र मोदी होरें 2017 च लागू कीती गेदे GST कानून गी इक महत्वपूर्ण सुधार दस्सेया जेदे थमां राष्ट्र गी बढ़ा फायदा पुज्जा ऐ।

स्वतंत्रता दिवस पर अपने भाषण च उन्हें GST च होर सुधार कीते जाने बक्खी संकेत दिते तां जे आम लोकें, करसानें, मध्यम वर्ग ते लौहके कारोबारें गी राहत थहोयै। उन्हें आक्खेया जे आत्मनिर्भर भारत लेई त्रंऊ स्तम्भें पर ध्यान दिता जाग जेदे तैहत सरकार GST च महत्वपूर्ण सुधार करोग। ए त्रै स्तम्भ न-ढांचागत सुधार, दरें च सुधार ते जीवन शैली गी सौक्खा बनाने दे जतन। केन्द्र सरकार नै GST दरें च सुधार दे प्रस्ताव गी GST कौंसिल आसेया खडेरी गेदी मंत्रियें दे ग्रुप गी भेजी दिता ऐ।

<><><><><><>

PM –Khelo Policy

प्रधानमंत्री नरेन्द्र मोदी होरें आक्खेया जे केन्द्र सरकार नै देश च खेड्डें दी बढ़ावा देने लेई खेलो इंडिया नीति लागू कीती ऐ। 79में स्वतंत्रता दिवस पर काल किले दे कोटें थमां राष्ट्र गी सम्बोधित करदे होई प्रधानमंत्री होरें आक्खेया जे खेलो इंडिया नीति देश च खेड्डे दे व्यापक विकास आस्तै साजगार वातावरण विकसित करोग। उन्हें आक्खेया जे कैई खेड्ड प्रतियोगिताएं दा आयोजन बक्ख-बक्ख स्तरें दे श्रेणियें च कीता जा रदा ऐ जिन्दे च खेलो इंडिया यूथ गेम्स, खेलो इंडिया युनिवर्सिटी गेम्स, खेलो इंडिया विंटर गेम्स ते खेलो इंडिया पैरा गेम्स शामिल न। प्रधानमंत्री होरें विकास च खेड्डें दे महत्व पर जोर पाया ते बच्चें गी खेड्डें लेई प्रोत्साहित करने आले माता-पिता दी सराहना कीती।

<><><><><><>

FAST Tag Pass

भारतीय राष्ट्रीय राजमार्ग प्राधिकरण नै Fast Tag Annual Pass दी सुविधा गी अज्जै थमां देशभरै दे इक हजार 150 टोल प्लाजें च लागू करी दिता ऐ। प्राधिकरण मुजब इक लकख 40 हजार शा मते उपभोक्ताएं कल संजा 7 बजे तोड़ी सलाना पास खरीदियें सक्रिय करी लैते दे हे। मंत्रालय आसेया दस्सेया गया ऐ जे NHAI दे अधिकारी ते नोडल अधिकारी टोल प्लाजा पर नियुक्त कीते गे न तां जे पास रक्खने आले यात्रियें गी परेशानी नैई आवै। Fast Tag Annual Pass गी शुरू कीते जाने दा मकसद बार-बार Fast Tag Re-Charge करने कोला बचना ऐ। नमां सलाना पास इक साल यां 200 टोल प्लाजा पार करने तोड़ी वैद होग ते सब्भनै गैर-कारोबारी गड़डियें लेई कम्म करोग।

<><><><><><>

Janmashtmi

श्री कृष्ण जन्माष्टमी अज्ज देश-विदेश च श्रद्धा ते उल्लास कन्नै मनाई जा रदी ऐ। खरी मती गिनतरी च श्रद्धालु भगवान श्री कृष्ण दी पूजा-अर्चना करने लेई मंदर ते ठाकुरद्वारें च पुज्जा रदे न। उत्तर-प्रदेश दे मथुरा ते वृंदावन च श्री कृष्ण जन्मोत्वस दी खास तयारी कीती गेई ऐ। भगवान श्री कृष्ण हुंदी जन्मस्थली मथुरा च श्री कृष्ण जन्मभूमि मंदर ते वृंदावन च श्री बाके-बिहारी मंदर, प्रेम मंदर ते इस्कॉन मंदर सनै सब्भनै मंदरै गी सुंदर सनाकड़े ढंगै कन्नै सजाया गेदा ऐ।

राष्ट्रपति द्रौपदी मुरमू होरें लोकें गी श्री कृष्ण जन्माष्टमी दियां शुभकामनां दितियां न। श्री कृष्ण जन्माष्टमी दी पूर्व संज्ञा राष्ट्रपति होरें अपने सनेह च इसी आनंद ते उत्साह दा त्योहार दस्सेया।

<><><><><><>

IMD-Weather

भारतीय मौसम विभाग नै अज्ज कोंकण ते गोवा च बड़ी तेज बरखा पौने दा अनुमान जाहिर कीता ऐ। असम-मेघालय-उत्तराखंड- मध्य महाराष्ट्र- तेलंगाना- पच्छमी मध्य-प्रदेश ते गुजरात च तेज बरखा पेई सकदी ऐ जिसलै के अरुणाचल प्रदेश- नागालैंड- मणिपुर-मिजोरम-त्रिपुरा- छत्तीसगढ़- तटीय आंध्र प्रदेश- कर्नाटक- केरल-माहे ते मराठवाड़ा च तेज बरखा दी संभावना ऐ। पूर्वी मध्य प्रदेश- पूर्वी राजस्थान- हरियाणा- चंडीगढ़- हिमाचल प्रदेश-पं जाब- सौराष्ट्र- विदर्भ ते पच्छमी उत्तर प्रदेश च बी तेज बरखा होने दी शेंका ऐ। राजधानी दिल्ली च बी बी तेज बरखा पौने दा अनुमान ऐ।

<><><><><><>

Export-Import Growth

भारत थमां चीजें-बस्तें दे निर्यात च जुलाई महीने च बड़ी मता बाद्दा दर्ज होआ ऐ। निर्यात च 7 इशारिया 3 प्रतिशत दी सलाना बढ़ौतरी दर्ज होई ऐ जेड़ी 37 इशारिया 2-4 बिलियन डालर बनदी ऐ।

बपार ते उद्योग मंत्रालय आसेया जारी आरजी आंकड़े मुजब निर्यात च तेजी आली चीजें-बस्तें च इंजीनियरिंग उत्पाद, गैहनें ते कीमती पत्थर, इलैक्टानिक्स दवाइयां ते जैविक ते गैर जैविक रसायन शामिल न। इंदे चा इलैक्ट्रानिक उत्पादें दे निर्यात च पिच्छले इक बरे च 34 प्रतिशत बढ़ौतरी होई ऐ जेड़ी 2 इशारिया 8-1 बिलियन डालर ऐ।

<><><><><><>

S. Korea Foreign Min

दक्खन कोरिया दे विदेश मंत्री Cho Hyun अज्ज रातीं अपनी पैहली 2 दिनें दी भारत यात्रा पर नमीं दिल्ली पुज्जा रदे न। इस दौरान ओह विदेश मंत्री एस. जयशंकर हुंदे कन्नै बी दपक्खी मामलें पर चर्चा दे इलावा केई महत्वपूर्ण कार्यक्रमें च शामिल होगन। इस यात्रा दौरान दवै मुख्य आदान-प्रदान ते सहयोग बदाने दे तरीकें पर चर्चा करगन। इस यात्रा च भारत ते दक्खन कोरिया बश्कार सैमीकंडक्टर, ग्रीन हाइड्रोजन, बपार ते समुन्द्री सुरक्षा जनेह क्षेत्रें च रणनीतिक सहयोग गी मजबूत करने पर ध्यान केन्द्रित कीते जाने दी मेद ऐ।

<><><><><><>

Trump-Putin Meeting

अलास्का च रुस दे राष्ट्रपति व्लादिमीर पुतिन ते अमरीका दे राष्ट्रपति डोनाल्ड ट्रम्प हुंदे बश्कार होई दी गल्लबात च यूक्रेन-रुस संघर्ष दे हल पर कोई समझौता नैई होई सकेया। बैठक लगभग त्रै घंटे तगर चली।

राष्ट्रपति पुतिन हुंदे कन्नै रुस दे विदेश मंत्री सर्गेई लावरोव ते विदेश नीति सलाहकार यूरी उशाकोव ते राष्ट्रपति ट्रम्प कन्नै अमरीका दे विदेश मंत्री मार्को रुबियो ते विशेष दूत स्टीव विटकाँफ बी बैठक च शामिल होए। बैठक मगरा सांझे संवाददाता सम्मेलन च राष्ट्रपति व्लादीमीर पुतिन होरें आक्खेया जे मुख रूप कन्नै यूक्रेन संघर्ष गी लेइयै गल्ल होई। पुतिन होरें आक्खेया जे ओह यकीनी तौर पर संघर्ष गी खत्म करना चाहन्दे न, पर स्थाई हल आस्तै संघर्ष दे प्राथमिक कारणें गी हल करना जरूरी ऐ।

<><><><><><>